

甲午季羅刹行紀

古水

甲午年六月十八 / 2014-07-14



季夏初，余以象胥職奉使羅刹，協和友鄰，輶傳伊爾庫茨克州，適遼、伊締好甘載，爰會其外交、經濟、典禮之官，與議二省州輯睦方畧暨邀接督撫訪遼事。

伊州綽穀東西，羅刹重城也，然余人入城，觀其街衢頽敝、商旅少行，暮氣沉伏，不禁訝然。或問御者：「貴州孰最富耶？」對曰：「督撫最富。」余聞而異之：「督撫鼎貴，未必饒財。」御者笑：「先生不知，敝地實多魁蠹纖螟，權門之下，私產猥盛，焉有不富？」或復問：「竊聞貴國有政，爲官不得營業，安得蓄私產耶？」御者但領其首：「確乎此政，然潛授私人，豪取又何差哉？貴國非是乎？」余遲顧左右，曰：「未至於斯。」

伊州濱北海，蘇子卿牧羝故處。余從路出海上，羅刹小娘字麗氏爲引，年正二九，頎秀娉婷，畧通漢語，自言習舞十年。字麗氏善攝像術，遂請攝影紀遊，得片俱佳，衆咸稱賞。今日得相片于同旅，翻檢見之，截詩志喜：「軺傳臨北海，願作牧羝人。漢節今持至，丹心定塞塵。」